

Nosse walon s' pièd ! I l' faut bin admète, on nè l' cause pus dès masses. Portant, i fait pârtiye di nos racènes. Nos nè l' p'lans nin lèyî moru.

Quand dj'èsteûve gamin, tos lès soçons di m' grand-père qui dj'anteûve tofêr avou li, i n' con'chin.n' qui l' walon. Maugré qu'on disfindeûve aus-éfants d' fé parèy, lès raupins di m' -y-âdje n'ont jamais djoké dè l' causer ètur zèls. On l' man.nicheûve èt l' discauser pace qu' il aureûve èspêchî d' aprinde li francès. À fait qu' dj'a crèchu, djè l'a aband'né p'tit à p'tit èto.

Ci n'èst qu'one cinquantin.ne d'anéyes pus taurd qu'i m'a ratiré : dès pîces di tèyâte, saquants gazètes ont riv'nu dispièrter ç' lingadje là ; i n'èsteûve qu'èdwârmu au fin fond di m' mémwêre, di mi-minme. Li lire, ça aleut co ! Li causer à l'ocâsion, poqwè nin ! Mins po l' sicrîre ? C'èsteûve one ôte paîre di mantches !

Vola douvint qui, on bia djoû, su l' Avenir, dj'aprend qu'on-z-a douviè one sicole di walon à Nameur. C'èst grâce à sès maïsses èt sès dames di scole qui dj' m'î a r'mètu : il avin.n' vinu rèwèyî tote li ritchèsse di ç' walon là : sès mots simpes, sès ratoûrnûres qui tchantenut si bin, qui n' sont faites qui d'imaudjes rapèchîyes dins l' vicadje dès p'titès djins, nos ratayons. Rètassîyes bin lon, là qu'èlle ont v'nu r'flori, ossi gaîyes qu'on pinson. I m'a choné qu' c'èst l' lingadje qui convint l' mia, par èg-zimpe, po lès fauves qui lès grands scrîjeûs s'enn'ont sièrvu, po spaude dès régues aujîyes à fé comprinde èt rit'nu tot l' long di s' vikériye, one façon d' porsûre si vòye à môde di djins.

Lès fauves sont-st-aus lwès ci qui l' dwègt è-st-à l' fèsséye !

Albert Delvaux

Nosse coq tchante co !

Albert Delvaux



*Fauves, prautes èt sondjerîyes
d'ayîr èt d'audjoûrdu.*